

Jon Mengiardi : 1893-1985

Autor(en): **Huder, Martin / Mengiardi, Jon**

Objektyp: **Article**

Zeitschrift: **Annalas da la Societad Retorumantscha**

Band (Jahr): **99 (1986)**

PDF erstellt am: **16.05.2024**

Persistenter Link: <https://doi.org/10.5169/seals-235112>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.


Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Jon Mengiardi

1893-1985



Nadal staiva sül vampoporta, cur chi'ns pervgnit dad Ardez la nouva dal decess da maschel Jon Mengiardi. Als 23 december as radunet in seguit in piazza da Bröl üna granda fuolla per tour cumgià dal defunt, gnü clamà a megl'dra vita ill'età avanzada da plü co 92 ans. Amis, vaschins, concitadins, ma eir rapreschantants da differentas instituziuns culturalas, dal bain public e da la politica d'eiran preschaints, per demuossar l'ultim'onur ad üna persunalità chi ha giodü l'arcugnuschentscha da tuot la populaziun d'ürant sia vita terrestre.

Maschel Jon Mengiardi es nat als 8 november 1893 ad Ardez. Davo avoir frequentà las scoulas cumünalas, s'ha el acquistà il diplom commer-

cial a la Scoula chantunala a Cuoir, per entrar in seguit in l'affar da colonials cha seis bap avaiva fuondà. Seis bainpensar, seis sen critic e na in ultim sias grandas cugnuschentschas illa ledscha civila e penala, sun bain stats ils motivs cha'l defunt es gnü inchargià cun üna schurma da caricar. Fingià in giuvens ans s'ha el interessà per la vita politica in cumün ed ha occupà cun zeli ed energia, fadia e lavur sgür tuot ils uffizis ch'ün cumün ha da surdar. Dal 1933 fin al 1935 til ha elet il circol da Sur-Tasna sco mastral, lura sco suppleant al Grand Cussagl e, d'ürant ils ans da l'ultima guerra mundiala, sco grandcusglier. Dal 1935 es el gnü elet aint il Tribunal districtual En ed ha collavurà là sco güdisch, vicepresidente e'ls ultims 18 ans, fin dal 1971, sco president. El d'eira versà illas ledschas da dret, tillas interpretaiva cun savüda giuridica, bainschi adüna eir resguardand toccantamaing il mumaint psicologic e'l stadi fisic-mental da l'uman.

Cun veemenza s'ha el eir ingaschà per l'utilisaziun da las auas e per la realisaziun da la Ouvras electricas d'Engiadina. Sperapro s'ha el cun granda premura dedichà a la pauraria ed ha sco president da la cumischiun da l'arrundimaint dal prüvi s-chaffi la basa per üna pauraria plü adattada a las esigenzas dal temp.

Güst quista vita variada sco negoziant, politiker e paur es stat üna triunità chi til ha adüna darcheu dat nouva forza ed energia, ma chi til ha eir mantgnü giuven in seis esser e pensar fin in ota età.

Maschel Jon nun ha tscherchà recreaziun fand vacanzas al «Grand Hotel» o dafatta al mar. Na, sia recreaziun d'eira per el la musica e surtuot il chant popular. Passand sper chasa via as dudiva suvent a maschel Jon a sunar il clavazin, laschand passar revista ün grand repertori da chanzuns ladinhas ch'el reproduaiva per granda part sainza notas. Sco fervent chantadur ha el fat part als cors da cumün ed al Cor viril d'Engiadina Bassa. Passa 25 ans ha el imbelli ils cults divins, sunand cun finezza e granda virtuosità l'orgel da baselgia. Ma eir uschigliö d'eira el ün fidel frequentadur dal cult divin, adüna consciaint cha l'uman bain ordaina, ma Dieu in ultim ans maina.

Il defunt ha passantà üna vita incurunada da lavur i'l servezzan da sia famiglia e da seis conumans. Maschel Jon Mengiardi nun es plü tanter da nus, ma seis artichels i'l Fögl Ladin, seis cudaschet «Sgrafits paurils» e sias innumbrablas traducziuns da missivas chantunalas e federalas daran amo lönch testimonianza da si'actività e da seis bainpensar a bön da la generalità.

Martin Huder